

**R J E Š E N J E**

**po Zaključku o pokretanju postupka po službenoj dužnosti  
protiv Fonda zdravstvenog osiguranja Republike Srpske  
radi sklapanja zabranjenih sporazuma**

**Sarajevo  
april, 2013.godine**

Broj: 04-26-3-25-15-II/12  
Sarajevo, 18.04.2013. godine

Na osnovu člana 25. stav (1) tačka e), člana 42. stav (1) tačka a), člana 48. stav (1) tačka a), a u vezi sa članom 4. stav (1) tačke b) i e) Zakona o konkurenciji («Službeni glasnik BiH», broj 48/05, 76/07 i 80/09) i članova 121. i 210. Zakona o upravnom postupku („Službeni glasnik BiH“, br. 29/02, 12/04, 88/07 i 93/09), u postupku pokrenutom po Zaključku o pokretanju postupka po službenoj dužnosti, broj: 04-26-3-25-II/12 od dana 20.12.2012. godine i broj: 04-26-3-025-11-II/12 od dana 14.03.2013. godine, protiv Fonda zdravstvenog osiguranja Republike Srpske, Zdrave Korde 8, 78000 Banja Luka, radi utvrđivanja postojanja zabranjenog sporazuma, Konkurencijsko vijeće na 58. (pedesetosmoj) sjednici održanoj dana 18.04.2013. godine, je donijelo

### **R J E Š E N J E**

1. Utvrđuje se da Fond zdravstvenog osiguranja Republike Srpske, Zdrave Korde 8, 78000 Banja Luka, odredbom člana 5. „Ugovora o snabdijevanju osiguranih lica lijekovima i medicinskim sredstvima u 2010., 2011. i 2012. godini, koji se izdaju na recept ili nalog osiguranim licima Fonda“, spriječava, ograničava i narušava tržišnu konkurenciju iz člana 4. stav (1) tačka e) Zakona o konkurenciji.
2. Utvrđuje se da Fond zdravstvenog osiguranja Republike Srpske, Zdrave Korde 8, 78000 Banja Luka, odredbom člana 5. „Ugovora o snabdijevanju osiguranih lica lijekovima i medicinskim sredstvima u 2010., 2011. i 2012. godini, koji se izdaju na recept ili nalog osiguranim licima Fonda“, ne narušava tržišnu konkurenciju iz člana 4. stav (1) tačka b) Zakona o konkurenciji.
3. Utvrđuje se da Fond zdravstvenog osiguranja Republike Srpske, Zdrave Korde 8, 78000 Banja Luka dodatnom odredbom „Javnog poziva za dostavljanje prijave za ugovaranje usluga izdavanja lijekova i medicinskih sredstava osiguranim licima Fonda zdravstvenog osiguranja Republike Srpske u 2010., 2011. i 2012. godini“, a koja se odnosi na visinu osnovice za obračun ličnih primanja zaposlenih magistara farmacije i farmaceutskih tehničara spriječava, ograničava i narušava tržišnu konkurenciju iz člana 4. stav (1) tačka b) i e) Zakona o konkurenciji.
4. Odredba člana 5. „Ugovora o snabdijevanju osiguranih lica lijekovima i medicinskim sredstvima u 2010., 2011. i 2012. godini, koji se izdaju na recept ili nalog osiguranim licima Fonda“ i odredba „Javnog poziva za dostavljanje prijave za ugovaranje usluga izdavanja lijekova i medicinskih sredstava osiguranim licima Fonda zdravstvenog osiguranja Republike Srpske u 2010., 2011. i 2012. godini“, koja se odnosi na visinu osnovice za obračun ličnih primanja zaposlenih magistara farmacije i farmaceutskih tehničara iz tačke 1. i 3. ovog Rješenja su ništavne (ex lege), u smislu člana 4. stav (2) Zakona o konkurenciji.
5. Nalaže se Fondu zdravstvenog osiguranja Republike Srpske, Zdrave Korde 8, 78000 Banja Luka da odmah, a najkasnije u roku od 60 (šezdeset) dana od dana prijema ovog Rješenja, uskladi odredbe važećih „Ugovora o snabdijevanju osiguranih lica lijekovima i medicinskim sredstvima, koja se izdaju na recept ili nalog osiguranim licima Fonda“, sa

Zakonom o konkurenciji, i da raspiše novi „Javni poziv za dostavljanje prijave za ugovaranje usluga izdavanja lijekova i medicinskih sredstava osiguranim licima Fonda zdravstvenog osiguranja Republike Srpske“ usklađen sa tačkom 3. dispozitiva ovog Rješenja, te da u ostavljenom vremenskom roku dostavi dokaze o izvršenju istih.

6. Izriče se novčana kazna Fondu zdravstvenog osiguranja Republike Srpske, Zdrave Korde 8, 78000 Banja Luka, zbog kršenja člana 4. stav (1) tačka b) i e) Zakona o konkurenciji, u visini od 42.000,00 KM (četrdesetdvijehiljadekonvertibilnihmaraka), u smislu člana 48. stav (1) tačka a) Zakona o konkurenciji, koju je dužan platiti u roku od 8 (osam) dana od dana prijema ovog Rješenja.

U slučaju da se izrečena novčana kazna ne uplati u navedenom roku, ista će se naplatiti prisilnim putem, uz obračunavanje zatezne kamate za vrijeme prekoračenja roka, prema važećim propisima Bosne i Hercegovine.

7. Ovo Rješenje je konačno i bit će objavljeno u „Službenom glasniku BiH“, Službenim glasilima entiteta i Brčko distrikta Bosne i Hercegovine.

### **O b r a z l o ž e n j e**

Konkurencijsko vijeće Bosne i Hercegovine (u daljem tekstu: Konkurencijsko vijeće) je nakon provedenih preliminarnih aktivnosti prikupljanja podataka i dokumentacije u vezi djelovanja Fonda zdravstvenog osiguranja Republike Srpske, Zdrave Korde 8, 78000 Banja Luka (u daljem tekstu: Fond) na tržištu pružanja usluga izdavanja lijekova na recept osiguranicima u Republici Srpskoj, došlo do saznanja da bi pojedine odredbe „Ugovora o snabdijevanju osiguranih lica lijekovima i medicinskim sredstvima u 2010., 2011. i 2012. godini, koja se izdaju na recept ili nalog osiguranim licima Fonda“ (u daljem tekstu: Ugovor o snabdijevanju lijekovima), zaključenog između Fonda i apotekarskih zdravstvenih ustanova (u daljem u tekstu: Apoteke) u Republici Srpskoj, mogle ograničiti, spriječiti i narušiti tržišnu konkurenciju.

Analizom Ugovora o snabdijevanju lijekovima, Konkurencijsko vijeće je ocjenilo da postoji osnovana sumnja postojanja zabranjenog sporazuma iz člana 4. stav (1) tačke b) i e) Zakona o konkurenciji (u daljem tekstu: Zakon).

#### **1. Postupak po Zaključku o pokretanju postupka po službenoj dužnosti**

Na osnovu navedenog, Konkurencijsko vijeće je u skladu sa članom 32. stav (1) Zakona, donijelo Zaključak o pokretanju postupka po službenoj dužnosti protiv Fonda (u daljem tekstu: Zaključak), dana 20.12.2012. godine broj: 04-26-3-25-II/12, radi ocjene da li „Ugovor o snabdijevanju osiguranih lica lijekovima“ predstavlja zabranjeni sporazum iz člana 4. stav (1) tačke b) i e) Zakona.

U skladu sa članom 33. stav (1) Zakona, Konkurencijsko vijeće je, dana 25.12.2012. godine aktom broj: 04-26-3-25-4-II/12, dostavilo predmetni Zaključak Fondu na odgovor te zatražilo relevantnu dokumentaciju potrebnu u postupku.

Traženu dokumentaciju, kao i odgovor na Zaključak, kojim u cjelosti osporava osnovanost istog, Fond je dostavio dana 13.01.2013. godine podneskom broj: 04-26-3-25-5-II/12 navodeći slijedeće:

- da je nesporno da je Fond na osnovu člana 58. Zakona o zdravstvenom osiguranju («Službeni glasnik Republike Srpske», br.18/99,51/01,70/01,51/03,57/03,17/08 i 01/09), člana 1. stav 2. Zakona o apotekarskoj djelatnosti («Službeni glasnik Republike Srpske», broj 119/08) i člana 30. Statuta Fonda («Službeni glasnik Republike Srpske», br.

06/04,19/04,19/05,63/08 i 64/09) objavio 2009. godine Javni poziv za dostavljanje prijave za ugovaranje usluga izdavanja lijekova na recept osiguranicima Fonda zdravstvenog osiguranja u 2010., 2011. i 2012. godini“ (u daljem u tekstu: Javni poziv);

- da je u Javnom pozivu između ostalog zatražena i Izjava ponuđača da će osnovica za obračun ličnih primanja zaposlenog magistra farmacije biti najmanje bruto plaća u visini od 2.311,74 KM i za zaposlenog farmaceutskeg tehničara u visini od 1.137,07 KM, za period važenja ugovora;
- da ovim postupkom Fond nije prekršio član 4. Zakona, jer time apotekarske ustanove nisu diskriminirane po osnovu javno-privatnog statusa, jer Fond nije imao namjeru da zloupotrebom ograniči ili kontroliše tržište;
- da je Fond ovim odredbama stavio u ravnopravan položaj javne i privatne apotekarske ustanove;
- da je Fond svojim diskrecionim pravom postavljanja uslova u pogledu plaćanja doprinosa samo uredio obavezu plaćanja doprinosa pod istim uslovima za sve učesnike u navedenom Javnom pozivu;

Uz odgovor na Zaključak, Fond je dostavio i neovjerene kopije 150 trenutno važećih Ugovora o snabdijevanju lijekovima sklopljenih sa Apotekama u Republici Srpskoj.

Konkurencijsko vijeće je dana 05.02.2013. godine aktom broj: 04-26-3-25-6-II/12, u skladu s članom 33. Zakona, zatražilo dopunu odgovora na predmetni Zaključak, u smislu dostavljanja podataka o pravnom osnovu za zaključenje Ugovora o snabdijevanju lijekovima, pravnom osnovu za uslov postavljen u Javnom pozivu, vezano za utvrđivanje osnovice za obračun plaća magistrima i farmaceutskim tehničarima zaposlenim u Apotekama, pojašnjenje dostavljenih podataka o budžetu Fonda, te sve Ugovore o snabdijevanju lijekovima koji su na snazi od dana 01.01.2013. godine.

Fond je dana 14.02.2013.godine podneskom broj: 04-26-325-7-II/12, dostavio odgovor na zahtjev i obrazloženje za nedostavljanje propisno ovjerenih važećih ugovora, radi obimnosti dokumentacije. U podnesku je navedeno da je postupak ugovaranja usluga izdavanja lijekova i medicinskih sredstava osiguranim licima Fonda u 2013. godini i 2014. godini u toku, odnosno navedeni ugovori još nisu zaključeni, te iz tog razloga nisu u mogućnosti dostaviti iste.

Konkurencijsko vijeće je dana 11.03.2013. godine, a na osnovu člana 35. stav (1) pod b) Zakona, te Zahtjeva za izvršenjem uvida broj: 04-26-325-8-II/12 od 07.03.2013.godine, izvršilo neposredan uvid u originalnu dokumentaciju Fonda u prostorijama na adresi Zdrave Kodre 8, u Banjoj Luci, o čemu je sastavljena službena zabilješka pod brojem: 04-26-325-13-II/12, te potvrđena ispravnost ranije dostavljenih fotokopiranih ugovora, koji nisu bili propisno ovjereni iz razloga obimnosti dokumentacije.

Nadalje, analizom Javnog poziva, Konkurencijsko vijeće je ocjenilo da postoji osnovana sumnja da Fond odredbama istog ograničava, spriječava i narušava tržišnu konkurenciju, te da Javni poziv može predstavljati zabranjeni sporazum iz člana 4. stav (1) tačke b) i e) Zakona, te je na osnovu člana 42. stav (2) Zakona, na 55. sjednici održanoj dana 13.03.2013. godine, donijelo Zaključak o proširenju Zaključka o pokretanju postupka po službenoj dužnosti broj: 04-26-3-25-10-II/12 (u daljem tekstu: Zaključak o proširenju Zaključka), kojim se Zaključak u tački 1. dispozitiva proširuje i na „Javni poziv“.

Zaključak o proširenju Zaključka, u skladu sa članom 33. Zakona, dostavljen je na odgovor Fondu dana 14.03.2013. godine aktom broj: 04-26-3-025-11-II/12, gdje je izjašnjenje Fonda na isti dostavljeno podneskom broj: 04-26-3-025-12-II/12 dana 26.03.2013.godine, sa slijedećim navodima:

- da je Zaključak o proširenju Zaključka u cijelosti nesvrshodan, obzirom da se protiv Fonda već vodi postupak zbog sumnje spriječavanja, ograničavanja i narušavanja tržišne konkurencije sklapanjem Ugovora o snabdijevanju lijekovima;
- da je apsurdno da se po istom osnovu i u istoj pravnoj stvari, vode dva postupka protiv Fonda.

## **2. Pravni okvir predmetnog postupka**

Konkurencijsko vijeće je tokom postupka primjenilo odredbe Zakona, Odluke o utvrđivanju relevantnog tržišta («Službeni glasnik BiH», br. 18/06 i 34/10) i odredbe Zakona o Zakona o upravnom postupku («Službeni glasnik BiH», br. 29/02, 12/04, 88/07 i 93/09).

Također, Konkurencijsko vijeće je uzelo u obzir i odredbe Zakona o zdravstvenom osiguranju, Zakona o apotekarskoj djelatnosti, Statuta Fonda i Javnog poziva za dostavljanje prijave za ugovaranje usluga izdavanja lijekova i medicinskih sredstava osiguranim licima Fonda zdravstvenog osiguranja Republike Srpske u 2010., 2011. i 2012. godini («Službeni glasnik Republike Srpske», broj 101/09).

## **3. Relevantno tržište**

U skladu sa članom 3. Zakona i čl. 4. i 5. Odluke o utvrđivanju relevantnog tržišta («Službeni glasnik BiH», br. 18/06 i 34/10) relevantno tržište se određuje kao tržište određenih proizvoda i/ili usluga koji su predmet obavljanja djelatnosti privrednih subjekata na određenom geografskom području.

Relevantno tržište proizvoda obuhvata sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

U konkretnom slučaju, relevantno tržište je tržište pružanja usluga snabdijevanja osiguranih lica Fonda lijekovima koji se izdaju na recept i medicinskim sredstvima koja se izdaju na nalog.

Relevantno geografsko tržište obuhvata cjelokupan ili značajan dio teritorije Bosne i Hercegovine na kojem privredni subjekti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuju od uslova konkurencije na susjednim geografskim tržištima.

U konkretnom slučaju, relevantno geografsko tržište je Republika Srpska, Bosna i Hercegovina, budući da Fond ima zaključene Ugovore samo sa zdravstvenim ustanovama, odnosno Apotekama sa područja Republike Srpske.

U smislu navedenog, Konkurencijsko vijeće je za relevantno tržište predmetnog postupka utvrdilo tržište usluga snabdijevanja osiguranih lica lijekovima koji se izdaju na recept i medicinskim sredstvima koja se izdaju na nalog, na teret Fonda, na području Republike Srpske.

#### 4. Utvrđeno činjenično stanje i ocjena dokaza

Nakon sagledavanja svih relevantnih činjenica, dokaza i dokumentacije dostavljene od stranke u postupku, kao i podataka kojima raspolaže Konkurencijsko vijeće, utvrđeno je sljedeće:

- da je Fond registriran u Okružnom Privrednom sudu Banja Luka, dana 09.12.2011.godine, pod brojem: 057-0-Reg-11-003382, MBS:1-10093-00, JIB: 400965150008;
- da je osnivač Fonda Vlada Republike Srpske, Trg Republike Srpske 1, 78 000 Banja Luka;
- da je osnovna djelatnost Fonda „djelatnost obaveznog osiguranja“;
- da je Fond u 2009. Godini, na osnovu člana 58. Zakona o zdravstvenom osiguranju, člana 1. stav (2) Zakona o apotekarskoj djelatnosti i člana 30. Statuta Fonda ,objavio Javni poziv;
- da je u Javnom pozivu pored ostalih uslova, od ponuđača zatražena i izjava da će osnovica za obračun ličnih primanja zaposlenog magistra farmacije biti najmanje bruto plaća u visini od 2.311,74 KM i za zaposlenog farmaceutskog tehničara u visini od 1.137,07 KM, za period važenja ugovora;
- da je Fond u skladu sa predmetnim Javnim pozivom za period od 01.01.2010 - 31.12.2012.godine, sklopio Ugovore o snabdijevanju lijekovima sa 150 apoteka u Republici Srpskoj;
- da je od 150 zaključenih Ugovora o snabdijevanju lijekovima za period od 2010.-31.12.2012.godine, još uvijek na snazi 148 Ugovora (dva Ugovora su raskinuta), obzirom da nisu zaključeni novi Ugovori o snabdijevanju lijekovima za 2013.godinu, i isti će se primjenjivati do dana zaključenja novih Ugovora o snabdijevanju lijekovima;
- da su Zaključeni Ugovori o snabdijevanju lijekovima tipskog karaktera;
- da član 5. Ugovora o snabdijevanju lijekovima sadrži odredbu kojom obavezuje Apoteke da će osnovica obračuna ličnih primanja zaposlenog magistra farmacije biti najmanje bruto plaća u visini od 2.311,74 KM i za farmaceutskog tehničara u visini od 1.137,07 KM, za period važenja ugovora.

Analizom odredbi i uslova Ugovora o snabdijevanju lijekovima, koji se odnose na uslov bruto plate magistra farmacije i farmaceutskog tehničara, Konkurencijsko vijeće je ocijenilo da isti nisu u skladu sa odredbama člana 4. stava 1) tačke e) Zakona.

Također, analizom dodatog uslova propisanog Javnim pozivom, a koji se odnosi na visnu bruto plate magistra farmacije i farmaceutskog tehničara, Konkurencijsko vijeće je utvrdilo da isti nije u skladu sa odredbama člana 4.stava 1) tačke b) i e) Zakona.

Članom 4. Zakona, propisano je da su zabranjeni sporazumi, ugovori, pojedine odredbe sporazuma ili ugovora, zajednička djelovanja, izričiti i prešutni dogovori privrednih subjekata, kao i odluke i drugi akti privrednih subjekata, koji za cilj i posljedicu imaju spriječavanje, ograničavanje ili narušavanje tržišne konkurencije na relevantnom tržištu, a koji se odnose na:

- b) ograničavanje i kontrolu proizvodnje, tržišta, tehničkog razvoja ili ulaganja;
- e) zaključivanjem takvih sporazuma kojima se druga strana uslovljava da prihvati dodatne obaveze koje po svojoj prirodi ili običajima u trgovini nisu u vezi sa predmetom sporazuma.

Konkurencijsko vijeće je utvrdilo da član 5. Ugovora o snabdijevanju lijekovima, koji sadrži odredbu kojom se obavezuju Apoteke da će osnovica obračuna ličnih primanja zaposlenog magistra farmacije biti najmanje bruto plaća u visini od 2.311,74 KM i za farmaceutskog tehničara u visini od 1.137,07 KM, za period važenja ugovora, nije u skladu sa članom 4. stav (1) tačka e) Zakona, budući da se Apotekama nameće dodatna obaveza koja po svojoj prirodi ili običajima u trgovini nije u vezi sa predmetom sporazuma.

Naime, propisana obaveza Apotekama da isplaćuju naznačene iznose plaća, predstavlja prijetnju direktnog utjecaja na njihovo poslovanje, obzirom da visina plaće kao finansijske kategorije, prvenstveno zavisi od finansijskog poslovanja nekog privrednog subjekta. Visina plaće predstavlja poslovnu odluku jednog privrednog subjekta i kao takva ne može biti predmet odnosno ne može biti određena Ugovorom o snabdijevanju lijekovima, koje Fond zdravstvenog osiguranja sklapa sa Apotekama.

Također, Konkurencijsko vijeće je utvrdilo da Fond odredbom člana 5. Ugovora o snabdijevanju lijekovima ne ograničava konkurenciju na relevantnom tržište iz člana 4. stav (1) tačka b) Zakona.

Nadalje, Konkurencijsko vijeće je utvrdilo da se dodatnim uslovom propisanim Javnim pozivom, a koji je vezan za visinu osnovice za obračun ličnih primanja zaposlenih magistara farmacije i farmaceutskih tehničara, ograničava pristup relevantnom tržištu Apotekama, koje nisu u mogućnosti da ispune postavljeni dodatni uslov, u smislu člana 4. stav (1) tačke b) Zakona.

Dodatnim uslovom propisanim Javnim pozivom, Apoteke su uslovljene da prihvate dodatnu obavezu, koja po svojoj prirodi ili običajima u trgovini nije u vezi sa predmetom sporazuma, u smislu člana 4. stav (1) tačka e) Zakona.

Konkurencijsko vijeće je utvrdilo da sve Apoteke imaju rješenje za obavljanje apotekarske djelatnosti izdano od resornog ministarstva Republike Srpske, te da su iste registrirane i djeluju u skladu sa općim i posebnim propisima na području Republike Srpske.

Nadalje Konkurencijsko vijeće je utvrdilo da je Fond svojim djelovanjem, odnosno predmetnim aktima, posredno utjecao na tržište nametanjem navedenih ograničenja što je onemogućilo slobodan pristup svim zainteresiranim Apotekama relevantnom tržištu i iste dovelo u neravnotežan položaj u ostvarivanju prihoda.

Predmetni pravni akti, sa aspekta propisa o zaštiti tržišne konkurencije, su pravnim i administrativnim barijerama ograničili pravo izbora svakoj Apoteci, odnosno slobodan ulazak Apoteka na relevantno tržište, te nepotrebno ograničili broj Apoteka u kojima kupci odnosno korisnici usluga mogu realizirati svoje pravo dobijanja lijekova na recept na teret novčanih sredstava Fonda.

Imajući u vidu navedeno, Konkurencijsko vijeće je odlučilo kao u dispozitivu ovog Rješenja.

Radi neospornog utvrđenog kršenja člana 4. stav (1) tačka e) Zakona, Konkurencijsko vijeće je naložilo Fondu, da u vremenskom roku od 60 (šezdeset) dana od dana prijema ovog Rješenja, izmjeni član 5. svih važećih Ugovora o snabdijevanju lijekovima, te da u ostavljenom vremenskom roku dostavi na uvid Konkurencijskom vijeću dokaze o izvršenju obaveze.

Također, radi utvrđenog kršenja člana 4. stav (1) tačka b) i e) Zakona, Konkurencijsko vijeće je naložilo Fondu da u vremenskom roku iz tačke 5. dispozitiva ovog Rješenja raspiše novi „Javni poziv za dostavljanje prijava za ugovaranje usluga izdavanja lijekova i medicinskih sredstava osiguranim licima Fonda zdravstvenog osiguranja Republike Srpske“ usklađen sa tačkom 3. dispozitiva ovog Rješenja, te da u ostavljenom vremenskom roku dostavi na uvid dokaze o izvršenju obaveze.

Imajući u vidu navedeno, Konkurencijsko vijeće je odlučilo kao u dispozitivu ovog Rješenja.

## **5. Novčana kazna**

U smislu člana 48. stav (1) tačka a) Zakona, novčanom kaznom u iznosu najviše do 10,0% (deset) vrijednosti ukupnog godišnjeg prihoda privrednog subjekta iz godine koja je prethodila godini u kojoj je nastupila povreda zakona kaznit će se privredni subjekat ako sklopi zabranjeni sporazum na način propisan odredbama člana 4. Zakona.

Polazeći od nesporno utvrđene činjenice da je Fond prekršio odredbe člana 4. stav (1) tačke b) i e) Zakona, Konkurencijsko vijeće je izreklo novčanu kaznu u iznosu od 42.000,00 KM (četrdesetdvijehiljadekonvertibilnihmaraka), što predstavlja 0,01% finansijskog plana Fonda za 2008. godinu, a koji je iznosio 413.000.000,00 KM (četiristotinetrinaestmiliona konvertibilnihmaraka).

Obzirom na visinu izrečene novčane kazne, Konkurencijsko vijeće nije imalo prvenstveno za cilj kažnjavanje zbog kršenja Zakona, već da upozori Fond na obavezu poštivanja pravila tržišne konkurencije utvrđenih odredbama Zakona.

Konkurencijsko vijeće je prilikom izricanja visine novčane kazne Fondu uzelo u obzir namjeru te dužinu trajanja povrede Zakona kao i posljedice koje je ista imala na tržišnu konkurenciju na relevantnom tržištu, u smislu člana 52. Zakona.

U slučaju da se izrečena novčana kazna iz tačke 4. ovog Rješenja ne uplati u navedenom roku, ista će se naplatiti prisilnim putem uz obračunavanje zatezne kamate za vrijeme prekoračenja roka, prema važećim propisima Bosne i Hercegovine.

Na osnovu iznesenoga Konkurencijsko vijeće je odlučilo kao u tački 6. dispozitiva ovog Rješenja.

## **6. Pouka o pravnom lijeku**

Protiv ovog Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Rješenja.

**Predsjednik**

**Gordana Živković**

### **Dostaviti:**

- **Fondu zdravstvenog osiguranja**
- **u spis**
- **a/a**